

彌勒菩薩所問經論卷第四

顯四

元魏天竺三藏法師菩提留支譯

問曰云何於諸世間心不疲倦答曰於見道時離身見等疲倦因故此明何義以諸凡夫取我相故爲生死等種種諸苦之所逼惱於

顯四

世間中生疲倦心諸菩薩等見法體時皆悉遠離著我相等是故菩薩於諸世間心不疲倦又復所以於諸世間心不疲倦以得遠離五怖畏故此明何義以世間衆生未離不活等五怖畏故於諸世間生疲倦心菩薩離不活等五種怖畏以離我相等故具足修集功德智慧是故菩薩於諸世間心不疲倦又得一味利他心故心不疲倦此明何義以諸菩薩依慈悲心起利他行深心善修猶如大海同一鹹味菩薩亦爾爲利益他一味心故以

諸菩薩利益他行即是自利爲利衆生修集諸行是故菩薩於諸世間心不疲倦又以菩薩得安住心故於諸世間心不疲倦此明何義以諸菩薩乃至惡道所謂活地獄黑繩地獄合地獄叫喚地獄多波那地獄波多波那地獄阿鼻地獄究羅地獄死屍地獄刀林地獄劒林地獄擘裂地獄安浮陀地獄阿波波地獄阿吒吒地獄憂鉢羅地獄拘勿頭地獄香地獄分陀利地獄波頭摩地獄種種寒熱受諸苦惱及泥犁中畜生餓鬼脩羅人天互相殺害共相食噉牽挽追求或生或退起於我慢嫉妬瞋恨恩愛別離怨憎合會老病死等憂悲苦惱如是種種諸苦惱相見聞不離利益衆生其心一向不退不轉畢竟安住大菩提心是名菩薩於諸世間心不疲倦又

不疲倦者以願堅固故此明何義以諸菩薩依大慈悲等起利益衆生行畢竟得深心根本諸行善知堅固心故隨順諸願作利益行是故菩薩於諸世間心不疲倦

問曰何者名為菩薩摩訶薩堅固心願答曰

有五種法名為菩薩堅固之願何等為五

願四

二

一者聲聞乘不能動轉二者辟支佛乘不能動轉三者諸外道論不能動轉四者一切諸魔不能動轉五者不以無因無緣自然動轉是故菩薩於諸世間心不疲倦復有五法於諸世間心不疲倦何等為五一者若見衰損利益心無憂喜二者所作已辦如實知道故三者如實知道果故四者自身得寂靜故五者拔諸衆生苦惱心故是故菩薩於諸世間心不疲倦又不疲倦者以得大慈大悲心故此

明何義以諸菩薩得大悲心見諸衆生沒溺生等極苦淤泥無明所盲貪愛所縛無所歸依菩薩以得慈悲心力智慧為首勤行精進拔衆生苦為諸衆生於世間中受苦惱業是故菩薩於諸世間心不疲倦復有五法知菩薩有大慈悲心何等為五一者為與衆生安隱樂故不惜一切資生之物二者不惜自身三者不護惜命四者修一切行不待多時五者怨親等悲是故菩薩於諸世間心不疲倦又不疲倦者能忍一切諸苦惱故此明何義以諸菩薩得依緣力其心勇猛過無數劫能受苦惱以能忍受一切苦惱是故菩薩於諸世間心不疲倦有五種法於諸世間能受苦惱何等為五一者信諸法無我二者信諸法空三者觀世間法四者觀諸業報五者觀察

願四

三

諸業已盡爲諸衆生於無量劫而受苦惱又不疲倦者深心常求佛菩提故此明何義以諸菩薩常以深心樂於涅槃求佛菩提以堅固增長爲一切衆生種菩提因緣善根種子行世間行是故菩薩於諸世間心不疲倦復有五法菩薩常求無上菩提何等爲五一者不同餘乘智勝餘乘故二者世間最上首故三者自度身故四者度他人故五者具足一切功德藏故又不疲倦者以爲教化諸衆生故此明何義菩薩長夜爲諸世間可化衆生隨順教化爲斷衆生世間苦惱雖爲種種苦箭所射而於世間心不疲倦又教化衆生者觀衆生心隨諸衆生於五乘法應受化者而授與之何等爲五一者應正遍知乘二者辟支佛乘三者聲聞乘四者天乘五者人乘又

不疲倦者勇健無畏故此明何義以諸菩薩依大智慧力故依勇猛無畏力故雖爲世間苦箭所射而於世間不生疲倦有五種法得知菩薩勇猛無畏何等爲五一者衰損敗壞其心不憂二者成就一切諸利益法其心不喜三者受諸苦惱其心不感四者得諸勝樂其心不欣五者瞋喜二相不可測知是名菩薩勇健無畏應知又不疲倦者不著身命故此明何義以世間人著身命故常爲生死苦箭所射類四背世間生疲倦心是故菩薩樂作利益諸衆生事如實知身命故棄而不著爲欲利益一切衆生是故菩薩於諸世間心不疲倦菩薩能知五種法故不著自身何等爲五一者知身不從過去世來二者知身不向未來世去三者知身非堅固法四者知身無

實神我五者知身無實我所是故菩薩不著  
自身菩薩能知五種法故不貪著命何等爲  
五一者依智慧活不依邪命二者怖畏一切  
諸不善法三者觀無始世來未曾不死四者  
等共一切諸衆生有五者不可常保又不疲  
倦者不著自樂故此明何義以諸衆生著自  
身樂受種種苦生疲倦心菩薩捨自身樂拔  
衆生苦是故菩薩於諸世間心不疲倦菩薩  
如實知五種法不求自樂何等爲五一者知  
樂如水上泡二者知樂敗壞時苦三者得世  
間方便以諸菩薩依善知識聽聞正法繫念  
思惟以爲根本得身及衆生出世方便四者  
不依他智五者依自智力又不疲倦者現見  
一切諸白法故此明何義以諸菩薩依丈夫  
力得果報故以諸白法依丈夫力故無量劫

事現見如夢於未來世不依他力三依自丈夫  
力修集諸白法作是思惟一切種智非他能  
與依自力得是故菩薩知不依他自發精進  
修集諸行速得阿耨多羅三藐三菩提如佛  
告阿難唯精進波羅蜜能得大菩提是故菩  
薩於諸世間心不疲倦又不疲倦者以證自  
然智故此明何義以諸菩薩過疲倦因是故  
成就不疲倦心善知一切諸因緣法依法生  
法次第增長猶如梯蹬依般若根本成就精  
進是故速證阿耨多羅三藐三菩提又不退  
不轉等諸句餘一切修多羅中廣說應知又  
復有義言不退者以得成就深心法故又不  
退者以得成就行心捨心故言不轉者以得  
成就深心法故降伏一切諸魔怨敵者以得  
成就善知回向方便心故如實知一切法自

體相者以得成就善知方便故於諸世間心  
不疲倦者以得成就大慈大悲心故以心不  
疲倦故不依他智速疾成就阿耨多羅三藐  
三菩提者以得成就般若波羅蜜故是故佛  
告彌勒菩薩摩訶薩言菩薩摩訶薩畢竟成  
就八法不退阿耨多羅三藐三菩提如是等  
問曰何故如來唯說八法不多不少答曰此  
非正問何以故若多若少俱致問故然佛世  
尊非無因緣說此八法以此八法具足成就  
菩提因故此明何義成就深心乃至般若波  
羅蜜畢竟成就此八種法具足菩薩功德智  
慧速疾成就一切種智以此八法具足成就  
佛菩提因是故如來唯說八法不多不少又  
復所以唯說八法以攝菩薩道故此明何義  
略說菩薩有二種道一者方便差別道二者

慧道成就深心乃至方便等諸句示現方便  
差別道成就般若波羅蜜者示現慧道是故  
文殊師利問菩提經中聖者文殊師利言諸  
天子菩薩摩訶薩略道有二以是略道速得  
阿耨多羅三藐三菩提何等為二一方便道  
二智慧道方便道者知攝善法智慧道者如  
實知諸法智又方便者觀諸衆生智慧者離  
諸法智又方便者知諸法相應智慧者知諸  
法不相應智又方便者觀因道智慧者滅因  
道智又方便者知諸法差別智慧者知諸法  
無差別智又方便者莊嚴佛土智慧者莊嚴  
佛土平等無差別智又方便者入衆生諸根  
行智慧者不見衆生智又方便者得至道場  
智慧者能證一切佛菩提法智以是義故但  
說八法不多不少又復所以但說八法以攝

助道斷道故此明何義即彼修多羅中說復次天子諸菩薩摩訶薩復有二種略道諸菩薩摩訶薩以是二道疾得阿耨多羅三藐三菩提何等爲二一者助道二者斷道助道者五波羅蜜斷道者般若波羅蜜又從深心乃至方便以爲助道攝五波羅蜜成就捨心攝檀波羅蜜成就行心攝尸波羅蜜成就深心攝羸提波羅蜜成就善知回向方便心成就善知方便攝毗離耶波羅蜜成就大慈心成就大悲心攝禪波羅蜜成就般若波羅蜜攝斷道如是有礙道無礙道有漏無漏等皆可類解應知又攝有量無量道故如彼經中說復有二種略道何等爲二一者有量道二者無量道有量道者取相分別無量道者不取相分別又從深心乃至方便等七句取相分

別攝有量道應知如是成就般若波羅蜜不取相分別攝無量道應知如是四家四攝四無量三十七品諸菩薩摩訶薩一切功德隨義相應八法皆攝應知  
問曰應說深心義云何深心義答曰深心義者心實不住非心相應慢使異相五陰相應起業修行增長因果深心因相違涅槃果相這修行善根非心相應行屬陰聚體隨順涅槃果如因聞慧生餘慧等是名深心又深心者心少時住離心相應善根行體依行起行猶如流水次第生法是名深心又深心者依種子生猶如乳等一切白法隨順因緣修行善法是名深心又深心者如久卷物雖暫牽舒放還依本深心亦爾隨本因作法還續如本不可說一不可說異是名深心又深心者

修學白法名爲深心又深心者修行一切諸善根法成就不失不增不減大涅槃法名爲深心

問曰如毗摩羅吉利致所說經說菩薩摩訶薩修無量行有無量心此深心者爲起何行

答曰此深心者頌四悉能發起求佛菩提一切諸行是名深心何以故以此深心發生一切菩提因故悉能增長諸功德力譬如尸羅此明何義如持戒人得善根尸羅一切善法無量差別悉名尸羅而身口意三業成就名爲尸

羅何以故身口意業與諸善法爲根本故深心亦爾與佛菩提因一切善行以爲根本故是故伽耶山頂經中月淨光德天子問文殊師利言諸菩薩摩訶薩深淨心以何爲本文殊師利答言天子諸菩薩摩訶薩深淨心以

阿耨多羅三藐三菩提心爲本以是義故此修多羅中所說深心菩提心爲本如金剛密迹經中說諸菩薩摩訶薩深心功德不誑世間以是故說爲菩提因應知

問曰以何義故得言菩薩成就深心答曰以一切所治法不能動轉故此明何義以種種苦惱不能動轉一切菩薩求菩提心彼時菩薩名爲成就深心應知又諸菩薩他身樂心有力降伏自身樂心故此明何義以彼菩薩自求樂心爲與他樂深心降伏彼時菩薩名爲成就深心應知又成就深心者以至究竟故此明何義以依深心中上法次第增長乃至畢竟堅固名爲成就深心應知又成就深心者以起難捨能捨心故此明何義若諸菩薩修行檀等難行布施深心發起修行等

心彼時菩薩名爲成就深心應知如聖者無盡意經中說以頭施等難捨能捨名爲成就深心應知又成就深心者以能降伏慳嫉等心故此明何義以諸菩薩得畢竟成就深心能降伏慳嫉等菩提道相違法彼時菩薩名爲成就深心應知如聖者無盡意經中說大德舍利弗諸菩薩深心者降伏嫉妬教化慳嫉衆生故如是等名爲成就深心應知又成就深心者以因果不盡故此明何義以諸菩薩深心因果無盡彼時名爲柔軟菩薩應知因不盡者修行廣大無量無邊故果不盡者一切佛法無量無邊以不斷絕三寶因故又無盡意經中說菩薩深心修行施等以其能捨一切物故是名菩薩成就修行如是等又言大德舍利弗諸佛如來十力四無所畏十

八不共法略說乃至一切佛法皆不可盡是故深心亦不可盡以修行果不可盡故故言菩薩成就深心又成就深心者依此經說應知以此經中說彌勒若菩薩摩訶薩聞讚歎佛及毀訾佛其心畢竟於阿耨多羅三藐三菩提堅固不動如是若聞讚歎法僧毀訾法僧亦復如是菩薩如是如實見知十二因緣即知諸佛如來法身於三寶中成堅固心以得無漏智畢竟深心故一切外道諸魔怨敵不能退轉是故菩薩成就深心

問曰以何義故先說深心次說修行答曰以彼修行是證智因故此明何義以修行心能與深心作證因故以起大慈大悲心故此心即是護持佛果應知而彼深心不可得見以依深心故眼耳等識於境界中不能發起損



害等心爲利益他離殺等行示現彼心以是義故說深心後次說修行應知又復示現次第義故此明何義一切諸法應當如是次第生故先說深心後說修行

問曰云何修行義答曰爲利益他起不損害深心身口意業攝自利行及利他行是名修行

問曰云何菩薩成就修行答曰以不共外道聲聞辟支佛故此明何義以諸外道求世間樂修善業道貪著世間樂果報故所修諸行

成世間果以其成就世間果故彼不能得成就修行又以聲聞辟支佛等求涅槃樂修善業道離大悲心成就小乘涅槃果故彼聲聞人於菩薩果不得名爲成就修行菩薩過於一切世間見諸世間種種過失乃至不著轉

輪聖王樂果報等雖復能證小乘涅槃依大慈悲勇猛心故捨涅槃樂求佛菩提修行十善業爲救一切諸衆生故攝大勝願其心唯以一切種智以爲究竟是故菩薩不同一切外道聲聞辟支佛等修行十善業道是故名爲成就修行

又成就修行者受持增上十善業道故此明何義以菩薩修行過於聲聞辟支佛等十善業道是故名爲成就修行諸菩薩摩訶薩有五種法勝於聲聞十善業道何等爲五一者專心修行故二者常修行故三者爲安隱自身故四者爲安隱他身故五者善清淨故專心修行者畢竟不離一味心故常修行者不斷不絕不休息故爲安隱自身者爲自身取人天安隱及大菩提故爲安隱他身者爲與

一切衆生安隱畢竟回向大菩提故以救過於無數衆生故善清淨者不破故不點故不汙故無所屬故善究竟故不食故智者讚歎故破者少分修治少分不修治故名爲破是故菩薩具足修治名爲不破點者自不修行教他修行故名爲點是故菩薩自身修行教他修行名爲不點汙者自不修行不教他修見他修行而心隨喜故名爲汙是故菩薩具足修行名爲不汙屬者要依他智而能修行故名爲屬是故菩薩不依他智而能修行名無所屬善究竟者專念畢竟欲心專念畢竟愛心專念畢竟恭敬心專念畢竟信心專念畢竟畏心專念畢竟無常心以是義故名善究竟食者回向於有取有資生故名爲食是故菩薩不取於有名爲不食智者不讚歎者

聲聞辟支佛乘中回向世間大乘中回向聲聞辟支佛乘故名智者所不讚歎是故菩薩聲聞辟支佛乘中不回向世間大乘中不回向聲聞辟支佛乘是故名爲智者讚歎又成就修行者出過一切諸世間故此明何義以諸菩薩修行十善業道勝諸世間是故名爲成就修行應知菩薩有五種法修行十善業道能過一切世間何等爲五一者願二者安隱三者深心四者善清淨五者方便願者菩薩摩訶薩凡所發願一切凡夫聲聞辟支佛無如是願是故菩薩依願修行十善業道則能出過一切世間如摩訶衍修多羅中無垢德女所說經言尊者目連諸菩薩摩訶薩從初發心乃至道場常爲一切世間天人而作福田勝諸聲聞辟支佛故安隱者以諸

菩薩雖爲一切世間極深重苦之所逼惱不能回轉取阿耨多羅三藐三菩提心爲阿耨多羅三藐三菩提故專心修行十善業道是故菩薩依安隱心修行十善業道則能出過一切世間深心者以最勝修行故以諸菩薩最深愛心修行十善業道是故菩薩依深心故修行十善業道則能出過一切世間清淨者除二地已上清淨菩薩何以故以諸菩薩摩訶薩等有三種清淨修行十善業道是故菩薩依清淨修行十善業道則能出過一切世間方便者菩薩於何等法中以何等方便修行十善業道餘世間衆生無如是方便是故菩薩依方便力修行十善業道則能出過一切世間

又成就修行者以時等無量故此明何義以

諸菩薩於無量世修行十善業道無量行等是故菩薩成就修行又諸菩薩得五種法故修行無量十善業道何等爲五一者無量世二者無量善法三者無量觀四者無量盡五者無量回向無量世者以諸菩薩過無量世修行十善業道是故菩薩於無量時修行十善業道無量善法者以諸菩薩修行無量善法以彼善法無量是故菩薩起無量善業道修行如如來清淨毗尼大乘修多羅中說迦葉如四大海滿中生酥一切衆生之所受用菩薩摩訶薩修集一切有爲善根亦復如是

以諸菩薩回向取彼無漏智故能與一切衆生受用無量觀者以爲無量衆生觀故以諸菩薩非爲有量衆生修行十善業道不作是念我爲若干衆生修集善根不爲若干衆生

修集善根以諸菩薩觀一切衆生修集善根  
是故菩薩善業無量無盡者如如來清淨毗  
尼修多羅中說諸天子譬如長者財富無量  
是大捨者行大慈者行大悲者大商主者憐  
愍一切諸衆生故而修行者不退心者起如  
是心我能與彼一切衆生無量無邊安隱之  
樂諸天子菩薩摩訶薩亦復如是以住深心  
爲諸衆生住安隱心起大精進心作是思惟  
我當教化無量無邊苦惱衆生皆悉安置涅  
槃樂中是故菩薩修行無盡無量回向者如  
初地中起無量願行十盡句等菩薩以彼十  
盡無量修行善業道亦復無量以依先回向  
無量故菩薩摩訶薩修行一切善業道果亦  
復無量是名無量回向  
又成就修行者以真實故此明何義以諸菩

薩摩訶薩真實希有修行十善業道是故菩  
薩成就修行菩薩有五種法成就希有何等  
爲五一者起大勇猛心二者精進三者堅固  
四者慧五者果起大勇猛心者發心能取阿  
耨多羅三藐三菩提假使有人若以指鉗或  
一指節能舉三千大千世界無量劫住此事  
非難發心能取阿耨多羅三藐三菩提是事  
爲難是故菩薩修行善業道成就希有精進  
者菩薩作是思惟衆生能發大勇猛心無量  
無邊勤精進者少不足言若能精進求菩提  
者是最希有是故菩薩若欲求於第一希有  
無量功德依大精進修善業道是故菩薩修  
行善業道成就希有堅固者以諸菩薩發大  
精進修行善業道住第一希有堅固力中故  
能進趣究竟精進是故菩薩修行善業道成

就希有慧者菩薩作是思惟勇猛精進堅固等法皆依般若根本而有是故般若希有之法何以故以依般若得有勇猛精進堅固是故菩薩作是思惟依於般若希有之法修行善業道是故菩薩成就般若果者以依修行善業道等故能生果證得無量無邊一切佛法是故成就希有之法

又成就修行者方便攝取故此明何義以諸菩薩依方便力攝取修行善業道故不同聲聞辟支佛等是故菩薩成就修行菩薩有五種法攝取方便應知何等爲五一者時處智二者回轉入智三者合智四者得意智五者次第智時處智者以何等時應該如是法以何等處應該如是法隨何等時應該如是化衆生隨何等處應該如是化衆生彼一切如實知

以依如是如是時處智如是如是教化衆生是名時處智回轉入智者菩薩如實知諸衆生於外道法中應該如是回轉如實知於佛法中應該如是入如實知如是回轉如實知置安樂中如實知如是置佛法中不復回轉取外道法彼處非十二因緣觀是回轉觀是名回轉入智合智者隨諸衆生以何等何等門相合善知彼彼門依彼彼門合彼彼衆生如信如力如分教化是名合智得意智者知衆生意知衆生信知衆生求如是知菩薩入彼修行入信入求入於言語隨順彼故起可化事如是起不回轉是名得意智次第智者知衆生業次第覺展轉覺所謂聲聞乘中說布施持戒人天果報說諸欲過說在家深過說出家利益又說苦集滅道次說須陀洹斯陀舍

阿那合阿羅漢果次說不可壞解脫次說無礙於辟支佛乘中說貯積過散用利益說在家過出家利益說戲論過靜默利益說聚落過阿蘭若利益說多欲知足過少欲知足利益說護諸根門於食知量初夜後夜精勤修行說觀中念想過樂空閑處說戒重三昧重般若重不被譏訶讚歎自利益讚歎深法非他知如是等於大乘中次第憂波提舍布施持戒忍辱精進禪定智慧次說實捨滅慧是名次第智

又成就修行者發菩提心十句願十句盡十句遠離退轉法修行不退轉法讚歎堅固精進讚歎堅固心讚歎安住智是名菩薩成就修行

又成就修行者讚歎住地法讚歎一向畢竟

地法說深退地法讚歎清淨地法讚歎能進趣地法讚歎住地中間可得法說地退法讚歎地果法讚歎地習氣果法是名菩薩成就修行

又成就修行者說諸地所謂歡喜地離垢地明地炎地難勝地現前地遠行地不動地善慧地法雲地是名菩薩成就修行

又成就修行者以諸菩薩深心攝取勝妙法故此明何義菩薩深心攝取妙法為不斷絕三寶為教化衆生行菩提行為一切種智修善業道是故菩薩成就修行善業道菩薩有五種法攝取妙法何等為五一者為欲報諸佛恩二者為自身故今妙法常住三者供養諸佛四者為欲利益無量衆生五者難得妙法故彼法復有五種法故名為攝取妙法何

等爲五一者自如實修行二者教他如實修行三者降伏諸魔惡刺四者捨黑阿波提舍五者攝取大阿波提舍諸比丘是名菩薩成就修行

又成就修行者以所作業無可譏訶故此明何義以諸菩薩一切所作住持修行善業道等皆不可譏訶是名菩薩成就修行有五種法諸業成就不可譏訶何等爲五一者有所爲作一切能成二者能得大果三者不違善法四者隨順清淨法五者德稱名聞是名菩薩成就修行

又成就修行者以起一切種修行清淨故此明何義以諸菩薩起一切種清淨十善業道是名菩薩成就修行如十地修多羅中說是菩薩復深思惟行十不善業道集因緣故則

墮地獄畜生餓鬼行十善業道集因緣故則生人中乃至生有頂處又是上十善業道與智慧觀和合修行其心狹劣故心獸畏三界故遠離大悲故從他聞聲而通達故聞聲意解成聲聞乘又是上十善清淨業道不從他聞故自正覺故不能具足大悲方便故而能通達深因緣法成辟支佛乘又是上上十善業道清淨具足其心廣大無量故爲諸衆生起悲愍故方便所攝故善起大願故不捨一切衆生故觀佛智廣大故菩薩地清淨波羅蜜清淨入深廣行成又是上上十善業道一切種清淨十力力故集一切佛法令成就故是故我應等行十善業道修行一切種令清淨具足故是名菩薩成就修行

又成就修行者以爲利益一切衆生修行十

類四

十八

善業道故此明何義以諸菩薩不著自樂修行十善業道爲利益衆生見我能利益衆生以慈悲心非直自利能自利已復能令他住十善業道是故菩薩成就修行以是義故十地修多羅中說是故我當先住善法亦令他人住於善法是故成就修行又如十地修多羅中說是菩薩復於一切衆生中生安隱心柔軟心慈悲心憐愍心利益心守護我心平等心師心生尊心又菩薩復作此念是諸衆生墮於邪見惡意惡心行惡道稠林我應令彼衆生行真實道住正見道如實法中如是等是故名爲成就修行

又成就修行者修行善業道畢竟無盡故此明何義以諸菩薩爲不斷絕三寶修行不斷絕常修行善業道無盡是故名爲成就修行

如無盡意修多羅中說大德舍利弗諸菩薩摩訶薩尸波羅蜜無盡以常修行故何以故凡夫戒者在所受生是故有盡人中十善盡故有盡欲界諸天福報功德盡故有盡色界諸天以禪無量盡故有盡無色界天取入諸定盡故有盡外道仙人所有諸戒退失神通盡故有盡一切聲聞學無學戒入涅槃際盡故有盡辟支佛戒無大悲心盡故有盡舍利弗菩薩淨戒皆無有盡何以故於是戒中出一切戒如種無盡果亦無盡是菩提種不可盡故如來戒禁亦無有盡

又成就修行者遠離身見煩惱垢故此明何義以諸菩薩十善業道離我見等垢彼時名爲清淨業道是故菩薩成就修行即彼修多羅中說清淨戒者所謂不著我相戲論如是



等是故名爲成就修行

又成就修行者以成就一切種清淨故此明何義以諸菩薩修行善業道一切種一切眷屬清淨彼時菩薩名善業道成就修行應知如彼修多羅中說無盡意言唯舍利弗菩薩

頌四

二十

戒衆六十六事清淨修治亦不可盡何等名爲六十六事一者於他衆生不起惱害二者於他財物不生竊盜三者於他婦女終不邪視四者於諸衆生無有欺誑五者初不兩舌於自眷屬知止足故六者無有惡口忍麤獷故七者無有綺語常善說故八者於他樂事不貪嫉故九者初無瞋恚惡言故十者正見不邪賤餘道故十一者深信於佛心不濁故十二者信順於法善法故十三者信敬於僧尊重聖衆故十四者五體投地志念佛

故十五者五體投地思惟法故十六者五體投地宗敬僧故十七者堅持禁戒一切無犯乃至小禁不放捨故十八者持不缺戒不依餘乘故十九者持不穿戒離惡處生故二十者持不荒戒不雜諸結故二十一者持不汙戒專長白法故二十二者持是深戒隨意回向得自在故二十三持讚歎戒智者不訶故二十四者持淳善戒正念知故二十五者持不訶戒一切戒不散故二十六者持善堅戒防護諸根故二十七者持名聞戒諸佛所念故二十八者持知足戒無不厭故二十九者持少欲戒斷貪惜故三十者持性淨戒身心寂滅故三十一者持阿蘭若戒離憤鬧故三十二者持聖種戒不求他意故三十三者持威儀戒一切善根得自在故三十四者持

頌四

三

如說戒人無不歡喜故三十五者持慈心戒  
護衆生故三十六者持悲心戒能忍諸苦故  
三十七者持喜心戒不懈怠故三十八者持  
捨心戒離愛恚故三十九者持自省戒心善  
分別故四十者持不求短缺戒護他心故四  
十一者持善攝戒善守護故四十二者持慧  
施戒教化衆生故四十三者持忍辱戒心無  
恚礙故四十四者持精進戒不退還故四十  
五者持禪定戒長諸禪枝故四十六者持智  
慧戒多聞善根無厭足故四十七者持多聞  
戒博學堅牢故四十八者持親近善知識戒  
助成菩提故四十九者持遠離惡知識戒捨  
遠離惡道故五十者持不惜身戒觀無常相  
故五十一者持不惜命戒勤行善根故五十  
二者持不悔戒心清淨故五十三者持不邪

命戒心行清淨故五十四者持不憊戒畢竟  
清淨故五十五者持不燒戒修善行業故五  
十六者持無慢戒心下不憍故五十七者持  
不淫戒遠離諸欲故五十八者持不高戒心  
平直故五十九者持柔和戒心無抵突故六  
十者持調伏戒無惱害故六十一者持寂滅  
戒心無垢穢故六十二者持順語戒如說行  
故六十三者持化衆生戒不離攝法故六十  
四者持護正法戒不違如實故六十五者持  
如頌成就戒於諸衆生心平等故六十六者  
持親近佛戒顯四入佛三昧具足一切諸佛法故  
是故名爲成就修行三五  
又成就修行者以成不共果故此明何義以  
諸菩薩成就修行十善業道攝取菩提心以  
是義故得菩提時成不共果是故名爲成就

修行應知如聖者娑伽羅龍王經中說龍王  
離殺生人得十種清淨法遠離殺生一切善  
根回向阿耨多羅三藐三菩提彼人得菩提  
時心自在故壽命無量如是等

問曰應說業道義云何業道義答曰次說云  
何說以造作故名爲業相即業名道能趣地  
獄故名業道又身口七業即自體相名爲業  
道餘三者意相應心又即彼業能作道故名  
業道此明何義唯心是業彼心七業共起名  
道餘三共相應名爲業道

問曰若即業名道皆悉能趣地獄等者何故  
餘三非是業道答曰如彼七業此三能作彼  
根本故以相應故不能如彼業故不名業道  
問曰一切美味飲酒食肉捲手摑打一切戲  
笑如是等惡行一切禮拜供養恭敬遠離飲

酒等如是等善行何故不說以爲業道答曰  
遠離飲酒等唯是心業能起七業非身口業  
是故非業道若作與心相應亦是業道

問曰若即彼業能作道名爲業道如是相解  
業道者一切法於心皆應名業道若爾何故  
但說十種業道不說無量業道答曰以勝重  
故此明何義以諸惡行及善行中十善道重  
餘非重故不說無量

問曰此義不然何以故以業不定故此明何  
義或有近遠方便爲重正業爲輕是故不應  
但說十業以爲業道不說無量答曰不然何  
以故十業多重近遠方便多輕又世間衆生  
多畏十業不畏近遠方便又十業道能作深  
重逼惱餘者不能是故汝說業不定者是義  
已答又汝向言一切法於心皆應名業道者

此義不然何以故七業一向極重意三亦輕亦重飲酒等不爾以是義故但說彼十名為業道不說餘者名為業道

問曰遠離殺生者殺生等相應說答曰殺生有八種一者故心二者他三者定不定眾生相四者疑心五者起捨命方便六者作七者不作相八者無作相是等名為殺生身業身口意業名為殺生故心者

問曰有人言不作心殺成殺生罪譬如觸火此明何義如火能燒若故心觸不故心觸皆能燒人殺生亦爾若故心殺不故心殺悉皆應得殺生罪報答曰不然何以故若無心殺得罪報者則阿羅漢不得涅槃此明何義以阿羅漢斷世間因有不作心而殺眾生如是亦應還生世間而實不然以是義故不故心

殺不得罪報又言如火者此義不然何以故以惡業中無惡心隔故此明何義猶如彼火薪炭等隔觸而不燒如是彼惡業中無惡心隔雖復殺生不能與報是故火喻義不相應問曰云何死者受苦而殺生者不得罪報答曰以心不壞故又此義不然何以故離逼惱眾生有罪離利益眾生有福如斷善根慈悲無諍滅盡定等得罪得福

彌勒菩薩所問經論卷第四

音釋

|   |     |   |      |   |     |   |     |
|---|-----|---|------|---|-----|---|-----|
| 擘 | 博厄切 | 馭 | 徒濫切  | 淤 | 依據切 | 墜 | 丁爵切 |
| 輒 | 乳充切 | 貯 | 掌與切  | 擴 | 古猛切 | 憤 | 對憤切 |
| 亂 | 也聞奴 | 攬 | 捷連員切 | 擲 | 古獲切 |   |     |
| 切 | 不靜也 |   |      |   |     |   |     |